



An Bhruiséil, 31 Márta 2026  
(OR. en)

7829/26

DELECT 61  
VETER 44  
AGRILEG 72

## NÓTA CLÚDAIGH

---

ó:	Ardrúnaí an Choimisiúin Eorpaigh, arna s(h)íniú ag Martine DEPREZ, Stiúrthóir
dáta a fuarthas:	27 Márta 2026
chuig:	Thérèse BLANCHET, Ardrúnaí Chomhairle an Aontais Eorpaigh
Uimh. an doic. ón gCoim.:	C(2026) 902 final
Ábhar:	RIALACHÁN TARMLIGTHE (AE) .../... ÓN gCOIMISIÚN an 27.3.2026 lena leasaítear Rialachán Tarmligthe (AE) 2020/687 a mhéid a bhaineann le bearta rialaithe galar i ndáil le hionfhabhtú leis an víreas gormtheanga (séiritíopa 1-24)

---

Gheobhaidh na toscaireachtaí i gceangal leis seo doiciméad C(2026) 902 final.

---

Faoi iamh: C(2026) 902 final



AN COIMISIÚN  
EORPACH

An Bhruiséil, 27.3.2026  
C(2026) 902 final

**RIALACHÁN TARMLIGTHE (AE) .../... ÓN gCOIMISIÚN**

**an 27.3.2026**

**lena leasaítear Rialachán Tarmligthe (AE) 2020/687 a mhéid a bhaineann le bearta rialaithe galar i ndáil le hionfhabhtú leis an víreas gormtheanga (séiritíopa 1-24)**

(Téacs atá ábhartha maidir le LEE)

## MEABHRÁN MÍNIÚCHÁIN

### 1. COMHTHÉACS AN GHNÍMH THARMLIGTHE

Le Rialachán (AE) 2016/429<sup>1</sup> ó Pharlaimint na hEorpa agus ón gComhairle an 9 Márta 2016 maidir le galair in-tarchurtha ainmhithe agus lena leasaítear agus lena n-aisghairtear gníomhartha áirithe i réimse na sláinte ainmhithe ('Dlí maidir le Sláinte Ainmhithe') leagtar síos rialacha i dtaca le galair in-tarchurtha ainmhithe agus rialacha i dtaca le ceanglais sláinte ainmhithe maidir le gluaiseachtaí ainmhithe talún laistigh den Aontas.

Le Rialachán Tarmligthe (AE) 2020/687 ón gCoimisiún<sup>2</sup> forlíontar rialacha an Dlí maidir le Sláinte Ainmhithe i dtaca le bearta rialaithe galar le haghaidh galair liostaithe áirithe lena n-áirítear ionfhabhtú leis an víreas gormtheanga (séiritíopa 1-24) ('ionfhabhtú leis an víreas gormtheanga').

Go dtí le déanaí, galar chatagóir C a bhí in ionfhabhtú leis an víreas gormtheanga, dá bhforáiltear i Rialachán Cur Chun Feidhme (AE) 2018/1882 ón gCoimisiún<sup>3</sup> agus bhí sé, dá réir sin, faoi réir cláir dhíothaithe roghnacha chun saoirse a bhaint amach i gcomhréir le Rialachán (AE) 2016/429.

Leagtar síos na forálacha maidir leis an stádas 'saor ó ionfhabhtú leis an víreas gormtheanga' a bhronnadh agus a choinneáil ar bun i Rialachán Tarmligthe (AE) 2020/689<sup>4</sup> cé is moite de na bearta rialaithe galar i gcás amhrais nó deimhniú maidir le hionfhabhtú le víreas gormtheanga i limistéir a bhfuil stádas saor ó ghalair acu. Leagtar síos na bearta rialaithe galar sin in Airteagail 68 agus 69 de Rialachán Tarmligthe (AE) 2020/687.

Rinneadh ionfhabhtú leis an víreas gormtheanga a athchatagóiriú mar ghalair chatagóir D le Rialachán Cur Chun Feidhme (AE) 2026/169 ón gCoimisiún<sup>5</sup> lena leasaítear Rialachán Cur Chun Feidhme (AE) 2018/1882. Beidh feidhm ag Rialachán Cur Chun Feidhme (AE) 2026/169 ón 15 Iúil 2026. I measc impleachtaí eile, tugann athchatagóiriú den sórt sin le tuiscint nach bhfuil na rialacha maidir le cláir dhíothaithe roghnacha le haghaidh an víris ghormtheanga agus le saoirse ó ghalair ábhartha a thuilleadh, lena n-áirítear na bearta rialaithe galar i gcás amhrais agus dearbhú i leith ráig i limistéir saor ó ghalair, toisc nach bhfuil feidhm acu ach amháin maidir le galair chatagóir C.

<sup>1</sup> IO L 84, 31.3.2016, lch. 1, ELI: <http://data.europa.eu/eli/reg/2016/429/oj>.

<sup>2</sup> Rialachán Tarmligthe (AE) 2020/687 ón gCoimisiún an 17 Nollaig 2019 lena bhforlíontar Rialachán (AE) 2016/429 ó Pharlaimint na hEorpa agus ón gComhairle a mhéid a bhaineann le rialacha maidir le galair liostaithe áirithe a chosc agus a rialú (IO L 174, 3.6.2020, lch. 64, ELI: [http://data.europa.eu/eli/reg\\_del/2020/687/oj](http://data.europa.eu/eli/reg_del/2020/687/oj)).

<sup>3</sup> Rialachán Cur Chun Feidhme (AE) 2018/1882 ón gCoimisiún an 3 Nollaig 2018 maidir le rialacha áirithe coiscthe agus rialaithe galar a chur i bhfeidhm maidir le catagóirí galar liostaithe agus lena mbunaítear liosta speiceas agus grúpaí speiceas a bhfuil riosca nach beag ag gabháil leo maidir le leathadh na ngalar liostaithe sin (IO L 308, 4.12.2018, lch. 21, ELI: [http://data.europa.eu/eli/reg\\_impl/2018/1882/oj](http://data.europa.eu/eli/reg_impl/2018/1882/oj)).

<sup>4</sup> Rialachán Tarmligthe (AE) 2020/689 ón gCoimisiún an 17 Nollaig 2019 lena bhforlíontar Rialachán (AE) 2016/429 ó Pharlaimint na hEorpa agus ón gComhairle a mhéid a bhaineann le rialacha maidir le faireachas, cláir dhíothaithe, agus stádas saor ó ghalair i gcás galair áirithe atá liostaithe agus galair áirithe atá ag teacht chun cinn (IO L 174, 3.6.2020, lch. 211, ELI: [http://data.europa.eu/eli/reg\\_del/2020/689/oj](http://data.europa.eu/eli/reg_del/2020/689/oj)).

<sup>5</sup> Rialachán Cur Chun Feidhme (AE) 2026/169 ón gCoimisiún an 26 Eanáir 2026 lena leasaítear an Iarscríbhinn a ghabhann le Rialachán Cur Chun Feidhme (AE) 2018/1882 a mhéid a bhaineann le haicmiú ionfhabhtaithe leis an víreas gormtheanga (séiritíopaí 1-24) mar ghalair liostaithe (IO L, 2026/169, 27.1.2026, ELI: [http://data.europa.eu/eli/reg\\_impl/2026/169/oj](http://data.europa.eu/eli/reg_impl/2026/169/oj)).

Dá bhrí sin, leis an ngníomh seo leasófar Rialachán Tarmligthe (AE) 2020/687 dá réir trí dheireadh a chur leis na forálacha maidir le bearta rialaithe galar atá le déanamh i gcás ina mbeidh amhras ann faoi ráig nó i gcás ina ndeimhneofar ráig i limistéir saor ó ghalair.

## **2. COMHAIRLIÚCHÁIN ROIMH GHLACADH AN GHNÍMH**

Chuaigh an Coimisiún i gcomhairle le baill den Ghrúpa Saineolaithe maidir le Sláinte Ainmhithe (E00930) i ndáil lena bhfuil sa dréacht-Rialachán Tarmligthe ag cruinnithe a tionóladh an 30 Meán Fómhair 2025 agus an 4 Samhain 2025.

Cuireadh an dréacht-Rialachán Tarmligthe ar fáil do Pharlaimint na hEorpa agus don Chomhairle freisin. Ní bhfuarthas aon bharúil ó Pharlaimint na hEorpa ná ón gComhairle.

Reáchtáladh roinnt malartuithe agus cruinnithe eile le páirtithe leasmhara, chomh maith le húdaráis inniúla na mBallstát inar pléadh spreagthaí agus eilimintí ábhartha maidir le cuspóir agus ábhar an dréachtghnímh tharmligthe.

## **3. EILIMINTÍ DLÍ AN GHNÍMH THARMLIGTHE**

Tá an Rialachán Tarmligthe seo le glacadh faoi chuimsiú Rialachán (AE) 2016/429, agus go háirithe de bhun Airteagail 76(5) agus 77(2) de.

# RIALACHÁN TARMLIGTHE (AE) .../... ÓN gCOIMISIÚN

an 27.3.2026

**lena leasaítear Rialachán Tarmligthe (AE) 2020/687 a mhéid a bhaineann le bearta rialaithe galar i ndáil le hionfhabhtú leis an víreas gormtheanga (séiritíopa 1-24)**

(Téacs atá ábhartha maidir le LEE)

TÁ AN COIMISIÚN EORPACH,

Ag féachaint don Chonradh ar Fheidhmiú an Aontais Eorpaigh,

Ag féachaint do Rialachán (AE) 2016/429 ó Pharlaimint na hEorpa agus ón gComhairle an 9 Márta 2016 maidir le galair in-tarchurtha ainmhithe agus lena leasaítear agus lena n-aisghairtear gníomhartha áirithe i réimse na sláinte ainmhithe ('Dlí maidir le Sláinte Ainmhithe')<sup>1</sup>, agus go háirithe Airteagal 76(5) agus Airteagal 77(2) de,

De bharr an mhéid seo a leanas:

- (1) Leagtar síos le Rialachán (AE) 2016/429 rialacha maidir le cosc agus rialú galar ainmhithe atá in-tarchurtha chuig ainmhithe nó chuig daoine, lena n-áirítear rialacha maidir le 'galair liostaithe', a shainmhínítear in Airteagal 4, pointe (18), den Rialachán sin. Go háirithe, le Teideal II de Chuid III de Rialachán 2016/429 leagtar síos rialacha maidir le bearta rialaithe galar, lena n-áirítear rialacha maidir le beartú tosaíochta agus catagóiriú galar liostaithe. Ina theannta sin, foráiltear le hAirteagal 5 den Rialachán sin go mbeidh feidhm ag rialacha sonracha ó thaobh galair de maidir le galair liostaithe a chosc agus a rialú, lena n-áirítear ionfhabhtú leis an víreas gormtheanga (séiritíopa 1-24).
- (2) Thairis sin, le hAirteagal 9(1) de Rialachán (AE) 2016/429 leagtar síos rialacha maidir le galair a chosc agus a rialú atá le cur i bhfeidhm maidir le catagóirí éagsúla galar liostaithe. De bhun Airteagal 9(2) de Rialachán (AE) 2016/429, le Rialachán Cur Chun Feidhme (AE) 2018/1882 ón gCoimisiún<sup>2</sup> déantar gach galar liostaithe a chatagóiriú mar ghalar chatagóir A, B, C, D nó E, atá faoi réir na rialacha sonracha comhfhreagracha ó thaobh galair de dá dtagraítear in Airteagal 9(1) de Rialachán (AE) 2016/429. Rinneadh ionfhabhtú leis an víreas gormtheanga a chatagóiriú mar ghalar C+D+E, mar a leagtar amach san Iarscríbhinn a ghabhann le Rialachán Cur Chun Feidhme (AE) 2018/1882. Dá bhrí sin, bhí sé faoi réir na rialacha sonracha ó thaobh galair de dá dtagraítear in Airteagal 9(1), pointí (c), (d) agus (e), de Rialachán (AE) 2016/429.

<sup>1</sup> IO L 84, 31.3.2016, lch. 1, ELI: <http://data.europa.eu/eli/reg/2016/429/oj>.

<sup>2</sup> Rialachán Cur Chun Feidhme (AE) 2018/1882 ón gCoimisiún an 3 Nollaig 2018 maidir le rialacha áirithe coiscthe agus rialaithe galar a chur i bhfeidhm maidir le catagóirí galar liostaithe agus lena mbunaítear liosta speiceas agus grúpaí speiceas a bhfuil riosca nach beag ag gabháil leo maidir le leathadh na ngalar liostaithe sin (IO L 308, 4.12.2018, lch. 21, ELI: [http://data.europa.eu/eli/reg\\_impl/2018/1882/oj](http://data.europa.eu/eli/reg_impl/2018/1882/oj)).

- (3) Glacadh Rialachán Tarmligthe (AE) 2020/687 ón gCoimisiún<sup>3</sup> faoi chuimsiú Rialachán (AE) 2016/429, agus forlíontar leis na rialacha maidir le feacht faoi ghalair, ullmhacht agus rialú atá le cur i bhfeidhm maidir leis na galair liostaithe dá dtagraítear in Airteagal 9(1), pointí (a), (b) agus (c), de Rialachán (AE) 2016/429. Go háirithe, le hAirteagail 68 agus 69 de Rialachán Tarmligthe (AE) 2020/687 leagtar síos rialacha maidir leis na réamhbhearta rialaithe galar atá le cur i bhfeidhm i gcás ina bhfuil amhras ar an údarás inniúil i mBallstáit nó i gcriosanna díobh ar bronnadh stádas saor ó ghalair dóibh go bhfuil galar chatagóir B nó C ann, agus maidir leis na bearta rialaithe galar atá le cur i bhfeidhm i gcás ina ndeimhnítear galar chatagóir B nó C. Tagraíonn an dá Airteagal sin d'ionfhabhtú leis an víreas gormtheanga.
- (4) San Iarscríbhinn a ghabhann le Rialachán Cur Chun Feidhme (AE) 2018/1882, arna leasú le déanaí le Rialachán Cur Chun Feidhme (AE) 2026/169 ón gCoimisiún<sup>4</sup>, rinneadh ionfhabhtú leis an víreas gormtheanga a athchatagóiriú mar ghalar chatagóir D+E, seachas mar ghalar chatagóir C+D+E. Mar thoradh ar an athchatagóiriú sin, maidir leis na rialacha a leagtar síos in Airteagal 68 pointe (c) agus in Airteagal 69 pointe (c) de Rialachán Tarmligthe (AE) 2020/687, rialacha a bhaineann le hionfhabhtú leis an víreas gormtheanga, lena n-áirítear na bearta rialaithe galar i gcás go bhfuil amhras ann faoi ráig d'ionfhabhtú leis an víreas gormtheanga i gcrios saor ó ghalair nó i gcás ráig den sórt sin a dheimhniú, níl siad ábhartha a thuilleadh, toisc nach bhfuil feidhm acu ach maidir le galar chatagóir C. Dá bhrí sin, ba cheart na tagairtí d'ionfhabhtú leis an víreas gormtheanga a scriosadh ó Airteagail 68, pointe (c), agus Airteagal 69, pointe (c), de Rialachán Tarmligthe (AE) 2020/687. Ba cheart, dá bhrí sin, Rialachán Tarmligthe (AE) 2020/687 a leasú dá réir.
- (5) Ós rud é go bhfuil feidhm ón 15 Iúil 2026 ar aghaidh ag na leasuithe arna ndéanamh ar Rialachán Cur Chun Feidhme (AE) 2018/1882 le Rialachán Cur Chun Feidhme (AE) 2026/169 a mhéid a bhaineann le catagóiriú nua an ionfhabhtaithe leis an víreas gormtheanga mar ghalar chatagóir D+E, ba cheart feidhm a bheith ag an Rialachán seo ón dáta sin ar aghaidh freisin.
- (6) Ba cheart, dá bhrí sin, Rialachán Tarmligthe (AE) 2020/687 a leasú dá réir,

TAR ÉIS AN RIALACHÁN SEO A GHLACADH:

#### *Airteagal 1*

Leasaítear Rialachán Tarmligthe (AE) 2020/687 mar a leanas:

1. in Airteagal 68, scriostar pointe (c);
2. in Airteagal 69, scriostar pointe (c).

---

<sup>3</sup> Rialachán Tarmligthe (AE) 2020/687 ón gCoimisiún an 17 Nollaig 2019 lena bhforlíontar Rialachán (AE) 2016/429 ó Pharlaimint na hEorpa agus ón gComhairle a mhéid a bhaineann le rialacha maidir le galair liostaithe áirithe a chosc agus a rialú (IO L 174, 3.6.2020, lch. 64, ELI: [http://data.europa.eu/eli/reg\\_del/2020/687/oj](http://data.europa.eu/eli/reg_del/2020/687/oj)).

<sup>4</sup> Rialachán Cur Chun Feidhme (AE) 2026/169 ón gCoimisiún an 26 Eanáir 2026 lena leasaítear an Iarscríbhinn a ghabhann le Rialachán Cur Chun Feidhme (AE) 2018/1882 a mhéid a bhaineann le haicmiú ionfhabhtaithe leis an víreas gormtheanga (séiritíopaí 1-24) mar ghalar liostaithe (IO L, 2026/169, 27.1.2026, ELI: [http://data.europa.eu/eli/reg\\_impl/2026/169/oj](http://data.europa.eu/eli/reg_impl/2026/169/oj)).

*Airteagal 2*

Tiocfaidh an Rialachán seo i bhfeidhm an seachtú lá tar éis lá a fhoilsithe in *Iris Oifigiúil an Aontais Eorpaigh*.

Beidh feidhm aige ón 15 Iúil 2026.

Beidh an Rialachán seo ina cheangal go huile agus go hiomlán agus beidh sé infheidhme go díreach i ngach Ballstát.

Arna dhéanamh sa Bhruiséil, 27.3.2026

*Thar ceann an Choimisiúin*  
*An tUachtarán*  
*Ursula VON DER LEYEN*